

Visoki predstavnik komentira glasanje o predsjedavajućem Vijeća ministara u Zastupničkom domu BiH

Visoki predstavnik, Wolfgang Petritsch, nakon što je Zastupnički dom u srijedu odbio predloženog kandidata za predsjedavajućeg Vijeća ministara, očekuju da Predsjedništvo bez odlaganja i na konstruktivan način imenuje novog kandidata. To znači da Predsjedništvo mora uzeti u obzir rezultate novembarskih izbora i raspodjelu mandata u Zastupničkom domu i voditi računa o tome da predloženi kandidat dobije potvrdu Doma. Konstruktivan pristup provedbi izbornih rezultata je nešto što je normalno očekivati od bilo koje demokratske evropske države, kao i ustavna obaveza.

Zahtjevi Smjernica EU (Road Map) i Vijeća Evrope su jasni u smislu koraka koje moraju poduzeti izabrani predstavnici BiH. Dok se ne formira Vijeće ministara i nove vlade na novou Federacije i Kantona, ne može doći do pomaka u ispunjavanju ovih zahtjeva.

Visoki predstavnik je zabrinut ponašanjem koje su pokazali neki visoki dužnosnici i stranke na otegnutoj sjednici održanoj u srijedu. On osuđuje huskacki i prijeteci rječnik koji su upražnjavali neki zastupnici i dužnosnici, pogotovo iskrivljena poredjenja sa predratnim periodom i prijetnje blokadom rada institucija BiH.

Iako se slaže sa tvrdnjom gosp. Jelavica da je "nevjerovatno" da tri mjeseca nakon izbora još nije formirana vlast, Visoki predstavnik je u potpunosti svjestan činjenice da ova izjava dolazi od predsjednika stranke koja najviše opstruira formiranja zakonodavne i izvršne vlasti na svim nivoima. Pored toga, gosp. Jelavic, kao hrvatski član Predsjedništva, je imenovao kandidata za kojeg je morao znati da nije vjerovatno da će dobiti saglasnost Zastupničkog doma.

Visoki predstavnik je također zabrinut ponašanjem SDS-a koji se pridružio HDZ-u po pitanju sumnji u ustavnost rada Zastupničkog doma, navodeći kao argument činjenicu da nije oformljen Dom naroda. SDS je iz tog razloga čak odbio i da glasa po pitanju mandatarata.

Prvo, radi pojašnjenja: za potvrdu predsjedavajućeg Vijeća ministara nije potrebna saglasnost Doma naroda, tako da je irelevantno da li je formiran Dom naroda ili ne. Ovakav stav je predsjedavajućem Zastupničkog doma prenio Visi zamjenik visokog predstavnika, Matthias Sonn, dana 29. januara 2001. godine, a objavljen je i u saopštenju za javnost OHR-a od 12. januara 2001.

Drugo, rukovodstvo SDS-a se potpisanim izjavom od 12. decembra 2000. godine obavezalo na "uspostavljanje i jačanje samoodrživih zajedničkih državnih institucija", "saradnju sa međunarodnom zajednicom" kao i na postivanje "obaveza iz Dejtonskog mirovnog sporazuma". Ponašanje koje je SDS pokazao u srijedu bilo je suprotno ovoj obavezi. Visoki predstavnik će reagirati na odgovarajući način.